

पौलाने लिहिलेले इफिसकरास पत्र पौलनी लिखेल इफिसकरसले पत्र वळख

ख्रिस्तना जन्मना ६० वरिस पहिले इफिसकरास पत्र हाई कलस्सैकरसले पत्र लिखं तवयच लिखाई गयं. प्रेषित हाई वळख देस की, तोच हाई पत्रना लेखक शे. १:१ कलस्सैकरसले पत्रना मायक हाई पत्रमा वयत्तीक शुभेच्छा दखास नही तरी बी जास्त करीसन विद्वान लोकसनं हाई म्हणनं शे की, पौलनीच हाई पत्र लिखेल व्हई. प्रांतना अलग अलग मंडळीसमा हाई पत्र फिराईसन वाचानं अस लेखन ईचार व्हई. जवय त्यानी हाई पत्र लिखं तवय पौल सांगस की, तो कैदखानामा व्हता. ३:१४:१, ६:२० जवय तिखीकस इफिस आठली मंडळीले भेटाले इफिसले जाई राहिता तवय पौलनी हाई पत्र त्याना हाते धाडं. ६:२१-२२

इफिस हाई भलतच मोठं शहर व्हतं. त्या येळले आशिया मायनर प्रांतनी ती राजधानी व्हती. शहरमा अर्तमीन नावनी ग्रीक देवनी मोठं मंदीर व्हतं. ज्यानामुये शहरले भलतीच प्रसिध्दी भेटनीप्रेषित १९:२३-३१ प्रेषित आठे इफिस मंडळीनी सुरवात जोरदार व्हयनी पण नंतर ती कमजोर अशी दखासप्रकटीकरण २:१-७.

देवनी आपला लोसकले निवडीसन ख्रिस्त येशुमा कसं त्यासनी पापसपाईन मुक्ती दिधी हाई पौल पत्रना पहिला भागमा स्पष्ट करस. तो कसं मंडळीनी तुलना त्या शरिरसंगे करस की, ज्यानं मस्तक ख्रिस्त शे अनी त्या इमारतना करस ज्याना कोपराना दगड ख्रिस्त शे. पत्रना दुसरा भागमा पौल ख्रिस्ती जिवन कसं जगाले पाहिजे यानाबद्दल बोध करस.

रूपरेषा

१. पौल स्वतःनी वळख दिसन इफिसकरसले शुभेच्छा देस. १:१-२
२. नंतर पौल मंडळीना ख्रिस्तसंगे नातं कसं रूढावाले पाहिजे हाई स्पष्ट करस १:३; ३:२१
३. नंतर पौल ख्रिस्ती जिवन कसं जगानं यानी वाट दखाडस. ४:१; ६:२०
४. पौल शेवटला शब्द लिखीसन पत्रना शेवट करस. ६:२१-२४

नमस्कार

- 1 ✨देवना ईच्छानुसार व्हयेल ख्रिस्त येशुना प्रेषित पौल मनाकडतीन, इफिसना देवना लोके अनं ख्रिस्त येशुवर ईश्वास ठेवणारासले,
 2 देव आपला पिता अनं प्रभु येशु ख्रिस्त ह्यानापाईन तुमले कृपा अनं शांती असो

ख्रिस्तमा आत्मिक आशिर्वाद

- 3 आपला प्रभु येशु ख्रिस्तना देव अनं पिता धन्यवादित असो. त्यानी स्वर्गमातला सर्व अध्यात्मिक आशिर्वाद दिसन आपलाले ख्रिस्तमा आशिर्वादित करेल शे.
 4 तसाच आपण त्याना समोर पवित्र अनं निर्दोष रहावाले पाहिजे म्हणीसन त्याना प्रेमघाई जगनी स्थापना पुर्वी आपलाले ख्रिस्तमा निवडेल शे.
 5 देवनी आपला मनना संकल्पप्रमाणे आपलाले येशु ख्रिस्तपाईन त्याना पोर्या व्हावाकरता प्रेमतीन पहिलेच नेमेल शे.
 6 त्यानी आपला प्रिय पोर्या पाईन देवनी देयल कृपाबद्दल आपन त्याना गौरवनी स्तुती कराले पाहिजे.
 7 ✨त्याना कृपाना समृद्धीप्रमाणे त्या प्रियकराना ठाई, कारण आपण ख्रिस्तना रक्त द्वारा मुक्त व्हयेल शेतस, म्हणजे आपला पापसनी क्षमा आपलाले मिळेल शे, हाई देवनी कितली महान कृपा शे
 8 त्यानी सर्व ज्ञान अनं बुद्धी यासनासंगे कृपा बी भरपूर करेल शे.
 9 देवनी सुरवातले करेल योजनाप्रमाणे त्यानी स्वतःना ईच्छातीन स्वतःनी करेल संकल्पसना गुपित आपलाले सांगात.
 10 ती योजना अशी की, कालखंडना पुर्णतानी व्यवस्था लावताना स्वर्गमा अनं पृथ्वीवर जे शे ते सर्व पृथ्वीवर एकत्र करीसन ख्रिस्त त्यासना अधिकारी व्हावाले पाहिजे.
 11 आपला मनना संकल्पप्रमाणे तो सर्व चालाडस त्याना योजनाप्रमाणे आम्हीनं पहिलेच नेमेल ख्रिस्तमा नितीमान व्हयेल शेतस
 12 ह्यानाकरता की, ज्या आम्हीनं ख्रिस्तवर पहिलेच आशा ठेयेल व्हती, ती आमनाकडतीन त्याना गौरवनी स्तुती व्हावाले पाहिजे.
 13 तुम्हीन सत्यनं वचन म्हणजे तुमना उध्दारबद्दलनी सुवार्ता ऐकी लेवानंतर ख्रिस्तमा ईश्वास ठेवा अनी त्यानी देवाना करेल पवित्र आत्माना तुमनावर त्यानामा शिक्का मारामां येल शे.

14 देवना गौरवनी स्तुती व्हावाले पाहिजे म्हणीसन त्याना भरवसाना लोकसनी, खंडणी भरीसन मिळाडेल मुक्तीनाकरता हाऊ पवित्र आत्मा आपला वतनना विसार शे.

पौलनी प्रार्थना

15 म्हणीसन तुमनामाधला प्रभु येशुवरना ईश्वस अनी सर्व देवना लोकसकरता तुम्हीन व्यक्त करेल प्रिती यानाबद्दल मी ऐकीसन;

16 मी बी तुमनाकरता आभार मानामां खंड पडु देस नही; मी मना प्रार्थनामा तुमनी आठवण करीसन असं मांगस की,

17 आपला प्रभु येशु ख्रिस्त याना देव जो वैभवशाली पिता यानी तुमले आपला वळख व्हावाकरता ज्ञानना अनी प्रकटीकरणना आत्मा देवाले पाहिजे;

18 म्हणीसन त्यामुये तुमना अंतःकरण प्रकाशित व्हईसन त्याना पाचारणमुये निर्माण व्हनारी आशा कोणती, “पवित्र जणसमा” त्यानी देयल “वतनना” वैभवनी समृद्धी कितली,

19 अनी ज्या आपन ईश्वस ठेवनारा त्या आपला विषयना त्याना सामर्थ्यना अपार महत्व ते काय शे हाई तुम्हीन त्याना बलशाली पराक्रमना कृतीवरतीन वळखीन लेवाले पाहिजे.

20 त्यानी ती कृती ख्रिस्तमा दखाडीसन त्याले मरेलमातीन ऊठाडं;

21 अनी सर्व स्वर्गीय सत्ताधीश, अधिकार, सामर्थ्य, प्रभुत्व अनी भावी युगन कोणतं बी नाव ल्या, त्या सर्वासतीन त्याले उंच करीसन स्वर्गमा उजवा बाजुले बसाडं.

22 ☆त्यानी सर्व त्याना पायखाल ठेवं, अनी त्यानी सर्वासवर मस्तक व्हावाले पाहिजे म्हणीसन त्याले मंडळीले दिधं;

23 मंडळी हाईच त्यानं शरीर. जो सर्वासनी सर्वकाही भरस त्यानी ती भरेल शे.

2

मरणमाईन जिवनकडे

1 ☆तुम्हीन आपला अपराध अनं आपला पापे यानामुये मृत व्हयेल व्हातात.

2 त्या पापसमा तुम्हीन पहिले चाली राहीतात, अर्थात जगना राहणीमान मायक आकाशमातील राज्यना अधिपती म्हणीन आज्ञा मोडणारा लोकसमा आते कार्य करनारा आत्माना अधिपती ह्याना धोरणप्रमाणतीन चाली राहिता.

3 त्या लोकसमा आम्हीन बी सर्व पहिले आपला शरिरनी अनी मननी ईच्छानामायक करी र्हाईतु अनी दुसरासनामायक संतापी स्वभावनी संतान व्हतुत;

4 तरी देव दयासंपन्न शे म्हणीसन आपन आपला अपराधसमुये मरेल व्हयेल व्हतुत तरी त्यानी आपलावरना स्वतःना अपरंपार प्रेममुये,

5 ख्रिस्तनासंगे आपलाले जिवत करं, देवना कृपातीन तुमनं तारण व्हयेल शे;

6 अनी ख्रिस्त येशुमा त्यानासंगे ऊठाडं अनी त्यानासंगे स्वर्गमा बसाडं;

7 ह्याकरता की ख्रिस्त येशुमा त्याना तुमना-आमनावरना ममताना द्वारा येनारा युगमा त्यानी आपला कृपानी भरपूर समृद्धी दखाडाले पाहिजे;

8 कारण कृपातीनचं ईश्वरासनाद्वारा तुमनं तारण व्हयेल शे अनी हाई तुमना हातघाई व्हयेल शे अस नही, तर हाई देवनं दान शे;

9 कोणी बडाई कराले नको म्हणीसन कर्म करीसन हाई व्हयनं नही.

10 आपण सत्कृत्ये कराले पाहिजे म्हणीसन ख्रिस्त येशुमा तयार करेल असा आपण त्यानी हस्तकृती शेतस, त्या सत्कृत्यसना आचारण करीसन आपन आपला आयुष्यक्रम चालाले पाहिजे म्हणीसन देवनी ती पहिलेच आखी ठेयल व्हती.

ख्रिस्तमा एकत्र

11 म्हणीसन आठवण करा की, तुम्हीन ज्या जन्मपाईन गैरयहूदी अनी ज्यासनी सुंता हाततीन करेल म्हणजे शरिरनी शे असा स्वतःले सुंती म्हनी लेणारा लोकसकडतीन बेसुंती समजना असा व्हता.

12 त्या तुम्हीन त्या येळले ख्रिस्तमाईन येगळा व्हयेल, इझ्राएलना राष्ट्रबाहेरना वचनना करारसले परका आशाहिन देवविना असा जगी राहींतात.

13 पन ज्या तुम्हीन पहिले “दुरना” व्हतात ते तुम्हीन आते ख्रिस्त येशुमा एक ख्रिस्तना रक्तना द्वारा “जवळना” व्हयेल शेतस.

14 कारण तोच आमनी शांती शे; त्यानी दोन्हीसले एक करं आनी मजारली आडी भित पाडी.

15 ☆त्यानी आपला शारीरतिन वैर म्हणीन आज्ञाविधीना नियमशास्त्र नाहिसं कर; यानाकरता की, स्वतःमा दोनजणसना एक मानव बनाडीसनी शांती प्रस्थापित कराले पाहिजे.

16 ☆अनी त्यासनं एक शरीर करीसन आपण ख्रिस्तना कुसखांबवर वैरभाव नष्ट करीसन त्यानाद्वारा दोन्हीसना देवसंगे समेट कराले पाहिजे.

17 अनी त्यानी ईसन ज्या तुम्हीन गैरयहूदी देवपाईन दुर व्हतात अनी यहूदी ज्या जोडे व्हतात त्या तुमले शांतीनी सुवार्ता सांगी.

18 कारण त्यानामुये आत्मानाद्वारा आपण यहूदी अनी गैरयहूदी पितानाजोडे उभा व्हतस

19 तर यावरतीन तुम्हीन आत्तेपाईन परका किंवा विदेशी नहीत पण पवित्र जणसना बराबरीना अनी देवना घरना शेतस.

20 प्रेषित अनी संदेष्टा या पायासवर तुम्हीन रचेल शेतस; स्वतः ख्रिस्त येशु मुख्य कोणशीला शे.

21 त्यानामा पुरी इमारत जोडीसन रचेल शे प्रभुमा वाढत वाढत पवित्र मंदिर व्हस.

22 प्रभुमा तुम्हीन बी आत्मानाद्वारे देवनं घर एकत्र रचाई जाई राहीनात.

3

गैरयहूदीसमा पौलनी सेवा

1 हाई कारणतीन मी पौल तुमना गैरयहूदीसकरता ख्रिस्त येशुना बंदिवान शे. मी देवले प्रार्थना करस

2 देवनी जी कृपा तुमना चांगला करता माले प्राप्त व्हयेल शे तिना व्यवस्थाविषयमा तुम्हीन ऐकेल व्हई.

3 देवनी माले प्रगटीकरननाद्वारा ज्या त्याना रहस्य सांगात तसच मी वर लिखेल शे

4 ☆ ते तुम्हीन वाचीन दखशात तर ख्रिस्तविषयना गुप्तज्ञान माले व्हयेल शे तुमले समजी.

5 ते रहस्य जसं आते आत्मानाद्वारे त्याना पवित्र प्रेषिततसले अनं संदेष्टासले प्रकट करी दखाडेल शे, तसं पहिला पिढीसना मनुष्यपूत्रसले सांगामा येल नव्हतं.

6 ते रहस्य हाई शे की, गैरयहूदी ख्रिस्त येशुमा सुवार्ताना योगतीन वतनबंधु, आमनासंगे एक शरीर अनं आमनासंगे अभिवचनना वाटकरी शेतस.

7 देवनं सामर्थ्यना करणीनं जे दान माले देवामा येल व्हता, त्यानामुये मी त्या सुवार्तानं सेवक व्हयनु शे.

8 मी जो पवित्र जणसमा सर्वासमा धाकला, तो मनावर पण हाई कृपा अस व्हयनी की, ख्रिस्तना अगाध समृद्धीना सुवार्ता गैरयहूदीसले सांगानी;

9 अनी ज्यानी येशु ख्रिस्तमा जे सर्वकाही बनाडं त्या देवना ठायी युगादिकाळपाईन जे गुप्त राहेल रहस्यनी व्यवस्था काय, हाई सर्वासले प्रकाशित करीसन दखाडानं;

10 त्यानाप्रमानतीन देवना बहुविध ज्ञान स्वर्गमधला अधिपती अनं अधिकारी यासले मंडळीनाद्वारे आते समजाले पाहिजे.

11 यानाकरता की अनंत युगना संकल्प आपला प्रभु ख्रिस्त येशुमा करा.

12 त्या प्रभुना एकतामा आपलाले त्यानावरला ईश्वासतीन धैर्य अनं निर्भयपणे प्रवेश बी भेटेल शे.

13 यास्तव मी ईनंती करस की तुमनाकरता ज्या क्लेश माले होतस त्यानामुये तुम्हीन खचीसन जावानं नही; ते तुमनाकरता फायदान शे.

ख्रिस्तनी प्रीती

14 त्या पितानासमोर मी गुडघा टेकिसन अशी प्रार्थना करस;

15 स्वर्गमातील अनं पृथ्वीवरला प्रत्येक वंशसले ज्या पितावरतीन नाव देवामा येसं.

16 त्यानी आपला गौरवनी संपत्तीमातीन तुमले अस दान देवाले पाहिजे की, तुम्हीन त्याना आत्मानाद्वारे अंतर्यामी बलसंपन्न व्हावे पाहिजे.

17 ख्रिस्तनी तुमना अंतःकरणमा तुमना ईश्वासनाद्वारा वास कराले पाहिजे; यानाकरता तुम्हीन प्रीतीमा मुरायेल अनं पाया घालेल असा असाले पाहिजे.

18 तुम्हीन देवना सर्व लोकसकडतीन ख्रिस्तना प्रेमनी रुंदी, लांबी, खोली अनं उंची कितली शे हाई चांगली पध्दतीन तुमले समजानं सामर्थ्य भेटावं,

19 हाई तुम्हीन सर्व पवित्र जणससंगे समजी लेवाले, अनं बुध्दीले अगम्य अशी ख्रिस्तनी प्रीती वळखी लेवाले शक्तीमान व्हावे पाहिजे; अस की तुम्हीन देवना सर्व पूर्णता ईतला परिपूर्ण व्हावे पाहिजे.

20 आपण ज्यानी काही मागणी किंवा कल्पना करतस त्यानापेक्षा आपलामा कार्य करणारी शक्तीतीन फारचफार कराले जो शक्तीमान शे,

21 देवना गौरव पिढ्यांनपिढी मंडळीमा अनं ख्रिस्त येशुमा युगानुयुग असो! आमेन.

4

मंडळीना सभासदसनी एकता

1 यास्तव मी जो प्रभु येशुमा बंदिवान तो मी तुमले ईनंती करस की, तुमले व्हयेल पाचारणले शोभी अस तुम्हीन चालाले पाहिजे.

2 ✨पुर्ण नम्रतातीन, सौम्यतातीन अनी क्षमाशिलतातीन वागीसन एकमेकसना प्रितीतीन सहन कराले पाहिजे.

3 शांतीना बंधनतीन आत्माना ऐक्य राखाले तुम्हीन प्रयत्न कराले पाहिजे.

4 तुमना पाचारननी जशी आशा एक त्याप्रमानतीन शरीर एक अनं आत्मा एक शे.

5 एक प्रभु, एक ईश्वर, एक बाप्तिस्मा शे

6 एकच देव शे, जो सर्वासना पिता शे, अनं प्रभु शे, जो सर्वव्यापी अनी सगळासमा शे.

7 तरी आपला सगळासले ख्रिस्तनी देयेल दानना परिणामना प्रमानतीन कृपा देयेल शे.

8 * शास्त्रलेख सांगस,

“जवय तो उंचस्थानवर चढना,

त्यानी त्यानासंगे बराच कैदीसले ली गया;

त्यानी लोकसले कृपा दिधी.”

9 “आते तो वर चढना” याना अर्थ काय शे? याना अर्थ हाऊ शे की तो पहिले पृथ्वीना सर्वात खालनी जागावर उतरना.

10 जो उतरेल व्हाता तोच सर्वकाही त्याना अधिकारतीन आपण भरीसन टाकाले पाहिजे म्हणीसन ऊर्ध्वलोकसवर चढना.

11 अनी त्यानीच कोणले प्रेषित, कोणले संदेश, कोणले सुवार्तिक, कोणले पाळक अनी शिक्षक असा नेमी दिधात.

12 यासले सेवानं कामकरता, ख्रिस्तना शरिरना रचनाकरता, देवना पवित्र लोकसनी पुर्णता व्हावी म्हणीसन देवामा वनं.

13 आपण सर्वासनी देवना पोश्यावरना ईश्वरसना अनं तत्संबधी ज्ञानना एकत्वास, प्रौढ मनुष्यपणास ख्रिस्तनी पुर्णता प्राप्त व्हई अस बुद्धीना मर्यादप्रत आपण सर्व ईसन पोहचतस तोपावत देयल शे.

14 यानाकरता की आपण यानापुढे लेकरंसनामायक राव्हाले नको, म्हणीसन माणुसना धूर्तपणतीन, भ्रांतीना मार्गले ली जाणारी युक्तीघाई, उपदेशस्पी प्रत्येक वाराघाई हेलकावनारा अनी फिरनारा असा व्हावले नको.

15 तर आपण प्रितीतीन सत्यले धरीसन मस्तक जो ख्रिस्त त्याना परिणामतीन सर्व प्रकारतीन वाढाले पाहिजे.

16 ☆त्यानाघाई पुरा शरिरनी, पुरवठा करनारा प्रत्येक सांधाना योगे, जुळवणूक अनं जमवाजमव व्हस, प्रत्येक अंगं आपआपला परिमाणतीन काम करत रूहास, अनी आपली रचना प्रितीमा व्हाकरता वाढ करी लेस.

ख्रिस्तमा नविन जिवन

17 यास्तव मी हाई सागंस की प्रभुना नावमा सावध करस की, गैरयहूदी लोके आपला मनना भ्रष्टतामा चाली राहिनात त्याप्रमानतीन तुम्हीन शेवटपावत चालु नका.

18 त्यासनी बुध्दी संबंधघाई अंधकारमय व्हयेल शे, त्यासनामधला अज्ञान अनं त्यासना अंतःकरणना कठीणपणा यामुये त्या देवना जिवनपाईन येगळे व्हयेल शेतस.

19 त्यासले आते कशानीच लाज वाटत नही, त्यामुये ते हावरापणतीन सर्व प्रकारनी अशुद्धता कराकरता स्वतःले कामातुरपणाना स्वाधीन करं.

20 परंतु तुम्हीन अशी रितीतीन ख्रिस्त शिकनात नही.

21 तुम्हीन त्यानंच ऐकेल शे, अनं येशुना ठायी जे सत्य शे त्याप्रकारतीन तुमले त्यानामा शिक्षण भेटेल शे.

22 ☆अस की तुमना पहिला आचारणना संबंधना जो जुना मनुष्यत्व त्याना तुम्हीन त्याग कराले पाहिजे, तो कपटना वासनातीन भरेल शे त्याना नाश व्हाव शे.

23 तर तुम्हीन आपला मनना अनी आत्मिक स्वभावतीन नवा व्हाव पाहिजे.

24 ☆अनी धार्मीकता अनं पवित्रता यासनी भरिसन असा देवमायक उत्पन्न करेल नवा मनुष्य धारण कराले पाहिजे.

25 यास्तव असत्यना त्याग करीसन तुम्हीन प्रत्येकजण आपआपला शेजारीसबदल सत्य बोला. कारण आपन ख्रिस्तना अवयव शेतस.

26 तुम्हीन राग करा, परंतु पाप करू नका; तुम्हीन रागावनात तर सुर्य मावळाले नको.

27 अनी सैतानले संधी देऊ ना.

28 चोरी करनारासनी परत चोरी कराले नको; तर गरजवंतसले देवाले आपलाजवळ काही पाहिजे म्हणीसन जे उत्तम तेच आपला हातसघाई काम करत राव्हाले पाहिजे.

29 तुमना तोंडवाटे कोणतं बी अमंगळ भाषण निंघाले नको, तर गरजपुरता अध्यात्मिक फायदाकरता जे काही चांगलं तेच निंघाले पाहिजे, त्यामुळे ऐकणारसले कृपादान प्राप्त व्हाई.

30 देवना पवित्र आत्माले दुःखाडु नका; त्यानामुळे तुम्हीन तारणना दिन पर्यंत मुद्रित व्हायेल शेतस.

31 सर्व प्रकारना कटुत्व, संताप, क्रोध, कलकलावट अनं अभद्र भाषण हाई, अवघा दुष्टपण बी तुमनापाईन दुर करामा येवो.

32 ☆अनी तुम्हीन एकमेकससंगे उपकारी अनं कनवाळू व्हावाले पाहिजे; जशी देवनी ख्रिस्तमा तुम्हले क्षमा करेल शे तशी तुम्हीन बी एकमेकसले क्षमा करा.

5

उजेडमा राहणारा व्हा

1 तर मंग तुम्हीन प्रिय पोर्त्यासनामायक देवना अनुकरण करनारा व्हावाले पाहिजे.

2 अनी ख्रिस्तनी तुमना वर प्रिती करी, अनी देवले सुवास मिळले पाहिजे म्हणीन स्वतःले आपलाकरता अर्पण अनं यज्ञ अस दिधं, तेनानुसार तुम्हीन बी प्रितीमा चाला.

3 जारकर्म, सर्व प्रकारनी अशुद्धता अनं लोभ, यासना तुमनामा उच्चार बी नको व्हावाले; हाई देवना लोकासले शोभस.

4 तसच अमंगळपणा, बाष्कळ गोष्टी अनं टवाळी यासना बी नको व्हावाले, त्या योग्य नही शेतस; तर त्यासनापेक्षा उपकारस्तुती व्हावाले पाहिजे.

5 जारकर्म, अशुद्ध वर्तन करनारा किंवा लोभी, हाऊ मुर्तिपुजक शे; असासले कोणले बी ख्रिस्तना अनं देवना राज्यमा वारसा नही हाई तुम्हीन जाणतस.

6 पोकळ भाषण दिसन कोणी तुमले फसाडाले नको; कारण असा गोष्टीसमुये आज्ञा मोडणारा लोकसवर देवना कोप व्हस.

7 म्हणीन त्यासना भागीदार व्हवानं नही;

8 कारण सुरवातले तुम्हीन अंधार अस व्हतात पण आते तुम्हीन प्रभुमा उजेड अस शेतस. म्हणीन प्रकाशना प्रजानामायक चाला;

9 कारण प्रकाशना फळ सर्व प्रकारना चांगुलपणा, नितीमत्व अनं सत्यता ह्यामा दखास.

10 प्रभुले काय संतोषकारक शे हाई पारखीन लेवानं.

11 अंधारना निष्फळ कर्मसना भागीदार व्हवु नका, तर उलट त्यासना निषेध करा;

12 कारण त्या लोकसना हाततीन ज्या कर्म गुप्तपणतीन व्हतस त्यासना उच्चार करानं सुध्दा लज्जा येवा सारखं शे.

13 सर्व निषेध करेल गोष्टी उजेडकडतीन उघड करामा येस, कारण जे काही उघड व्हस तो प्रकाश शे.

14 म्हणीन तो सांगस, हे झोपाळ, जागा व्हय अनं मरेल मातीन ऊठ, म्हणजे ख्रिस्तना प्रकाश सर्व गोष्टी तुनावर प्रकट करी.

15 म्हणीन मुखनामायक नही तर ज्ञानीनामायक समोर नजर ठेईन जपीसन चाला.

16 ✨येळना सदुपयोग करा, कारण दिन वाईट शेतस.

17 म्हणीन तुम्हीन मुखसना मायक व्हवानं नही, तर प्रभुनी ईच्छा काय शे हाई समजी ल्या.

18 द्राक्षरस पिसन मस्त व्हवु नका; द्राक्षरसमा बेतालपणा शे; पण पवित्र आत्मातीन परीपूर्ण व्हा.

19 ✨स्तोत्र, गीत, अनं अध्यात्मिक प्रबंध हाई एकमेकसले म्हणी दखाडा; आपला अंतःकरणमा प्रभुले गायनवादन करा;

20 आपला प्रभु येशु ख्रिस्त ह्याना नावमा सर्व गोष्टीसबद्दल सर्वदा देवबापनी उपकारस्तुती करत जा.

बायको अनी नवरा

21 ख्रिस्तना भय धरीन एकमेकसना अधीन रावानं.

22 ✨बाईसवनं, तुम्हीन जश प्रभुना अधीन तस आपआपला नवराना अधीन रावानं.

23 कारण जश ख्रिस्त मंडळीना मस्तक शे, तस नवरा बायकोना मस्तक शे. तसच ख्रिस्त हाऊच शरिरना तारणकर्ता शे.

24 तरी मंडळी जश ख्रिस्तना अधीन र्हास, तसच बायकासनी बी सर्व गोष्टीसमा आपला नवराना अधीन रावानं.

25 ✨पतीनों, जश ख्रिस्तनी मंडळीवर प्रिती करी तसच तुम्हीन बी आपापला बायकोवर प्रिती करा; ख्रिस्तनी मंडळीवर प्रिती करी अनी स्वतःले तिनाकरता समर्पण करं,

26 यानाकरता की, तिले त्यानी वचननाद्वारा जलस्नानतीन स्वच्छ करीसन पवित्र कराले पाहिजे.

27 अनी गौरवयुक्त मंडळी अस ती स्वतःले तयार कराले पाहिजे, म्हणजे तिले डाग, सुरकुती अनं कोणतं बी कमतरता यासनामाईन काहीच नही दखावता ती पवित्र अनं निर्दोष अस रहावाले पाहिजे.

28 त्याप्रमाणे पतीसनी आपापला बायकोले आपलं शरीर शे हाई समजीन तिनावर प्रीती करानी जो आपला बायकोवर प्रीती करस तो स्वतः वरच प्रीती करस.

29 कोणी कधीच आपला शरीरना व्देष करस नही; तर तो त्याना पालन पोषण करस; जश ख्रिस्त बी मंडळीना पालन पोषण करस तसच तो बी करस.

30 कारण आपण ख्रिस्तना शरीरना अवयव शेतस.

31 म्हणीन पुरुष आपला माय बापले सोडीसन आपला बायकोले जडी राही; अनी त्या उभयता एक शरीर व्हेतीन.

32 हाई रहस्य मोठं शे पण मी ख्रिस्त अनं मंडळी यासना संबधनाबद्दल बोली रहायनु शे.

33 तसच तुमनापाईन प्रत्येकनी जसं स्वतःवर तसच आपला बायकोवर प्रीती करानी; अनी बायकोनी बी पतीना मान ठेवाले पाहिजे.

6

मुलं अनं मायबाप

1 ✠पोर्यासवनं, प्रभुमा तुम्हीन आपला मायबापना आज्ञामा राहजा, कारण हाई योग्य शे.

2 आपला बाप अनं माय यासना मान ठेव, हाईच पहिली वचनयुक्त आज्ञा शे.

3 यानाकरता की, तुनं कल्याण व्हावाले पाहिजे अनं तु पृथ्वीवर दीर्घायु राहो.

4 ✠बापसवनं, तुम्हीन आपला पोर्यासले चिडमा लवानं नही; तर प्रभुना शिस्तमा अनं शिक्षणमा त्यासले वाढवा.

सेवक अनी धनी

5 ✠दाससवनं, आपण ख्रिस्तनाच आज्ञापालन करी रहायनु शे तस अस भावतीन तुम्हीन भिसन अनं कापीसन सरळ अंतःकरणतीन आपला शरीरदशामधला धनीना आज्ञापालन करत जा;

6 माणसंसले खूश करनारा लोकसनामायक तोंडदेखल्या चाकरीतीन नही, तर देवनी ईच्छा मनपाईन पुर्ण करनारा ख्रिस्तना दाससनामायक ते करत जा.

7 हाई चाकरी माणसंसनी नही तर प्रभुनी शे अस समजीन ती सद्भावतीन करा;

8 कारण तुमले माहित शे की, प्रत्येकजण, मंग तो देवना दास र्हावो किंवा स्वतंत्र र्हावो, जे काही चांगलं करस, तेच तो प्रभुकडतीन भरीसन पाई.

9 ✨धनीसवनं, तुम्हीन बी त्यासनासंगे तसच वागा; अनं धमकावानं सोडी घा, कारण तुमले हाई ठाऊक शे की, तुमना अनं त्यासना धनी स्वर्गमा शे अनी त्यानाजोडे पक्षपात नही.

ख्रिस्ती मनुष्यनी शस्त्रसामग्री

10 शेवट, प्रभुमा अनं त्याना प्रभावी सामर्थ्यमा बलवान व्हत जा.

11 सैतानना डावपेचपाईन तुमले उभा र्हाता येवाले पाहिजे म्हणीन देवनी शस्त्रसामग्री धारण करा.

12 कारण आपलं युध्द रक्तमासनासंगे नही, तर सत्तासनासंगे, अधिकारीसनासंगे, सध्याना काळोखामधला जगना अधिपतीसनासंगे, आकाशमधला दुरात्मासनासंगे शेतस.

13 यास्तव तुम्हीन वाईट दिनले विरोध कराले अनं सर्वकाही करानंतर टिकी राव्हाले समर्थ पाहिजे म्हणीसन देवनी सगळी शस्त्रसामग्री ल्या.

14 यास्तव सत्यतीन आपली कंबर बांधिसन, नितीमत्वस्पी उरस्त्राण धारण करा.

15 शांतीना सुवार्तातीन बनेल सिध्दतानी पादुका पायमा घालीसन,

16 अनी या सर्वाखेरीज जिना मुये दुष्टना सर्व जळता बाण तुम्हले विज्ञाडता येतीन ती ईश्वासस्पी ढाल धरीसन उभा रहा.

17 तारणस्पी शिरस्त्रान अनं देवनं वचन अशी आत्माना तलवार, हाई बी ल्या.

18 सर्व प्रकारे प्रार्थना अनं ईनंती करा, सगळा समयले आत्माना प्रेरणातीन प्रार्थना करा; अनी या कामतीन सर्व तत्पर व्हईसन अनं सर्व पवित्र लोकेसकरिता प्रार्थना करीसन जागृत राहा.

19 तवय मी काय बोलाले पाहिजे ते माले समजी येवाले पाहिजे; यानाकरता की जसं मी बोलाले पाहिजे तसं माले उघडपणे बोलता येवाले पाहिजे.

20 मनासाठीबी ईनंती करा; ती अशी शे ज्या सुवार्ताकरता मी बेडिमा पडेल वकील शे त्याना उलगडा कराकरता मी आपला तोंड उघडसु.

सलाम

21 ☆☆मन कसं काय चाली राहिनं शे हाई, प्रिय भाऊ अनं प्रभुमधला ईश्वरासु सेवक तुखिक हाऊ तुमले सर्व सांगी; तवय तुमले समजी;

22 आमनी बातमी तुमले समजाले पाहिजे अनं त्यामा तुमनं अंतःकरणन समाधान व्हावे पाहिजे यानाकरता मी त्याले तुमनाकडे धाडेल शे.

23 देवपिता अनं प्रभु येशु ख्रिस्त यानापाईन भाऊसले शांती अनं ईश्वरासनासोबत प्रिती लाभो.

24 आपला प्रभु येशु ख्रिस्त यानावर ज्या अमर प्रिती करनारा त्या सर्वासवर कृपा असो.

प्रेम संदेश

**The Gospels of Matthew and Mark in the Ahirani
language of India. Ahirani: प्रेम संदेश (Bible)**

copyright © 2023 The Word for the World International and Ahirani Christi
Iswari Mandli, Sakri, Dhule, Maharashtra

Language: अहिराणी (Ahirani)

Contributor: The Word for the World International

प्रेम संदेश

जुना करार, 2025

The Old Testament Books in Ahirani Language

The Word for the World International

This translation is made available to you under the terms of the Creative
Commons Attribution Share-Alike license 4.0.

You have permission to share and redistribute this Bible translation in
any format and to make reasonable revisions and adaptations of this
translation, provided that:

You include the above copyright and source information.

If you make any changes to the text, you must indicate that you did so in
a way that makes it clear that the original licensor is not necessarily
endorsing your changes.

If you redistribute this text, you must distribute your contributions
under the same license as the original.

Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

Note that in addition to the rules above, revising and adapting God's Word
involves a great responsibility to be true to God's Word. See Revelation
22:18-19.

2025-07-11

PDF generated using Haiola and XeLaTeX on 10 Jul 2025 from source files
dated 11 Jul 2025

6e2997e4-b06d-5108-bd98-2b3ff67a6f92